

**KUMPUAN**  
RAM LEH HNAM  
HUMHALH

**YMA**

**AW**



CHANMARI WEST BRANCH YMA CHANCHINBU KARTIN CHHUAK. VOL. XXIV. ISSUE NO.45 10<sup>th</sup> November 2013

## Ni 14 zan hian Indoor Stadium-ah Sport tan a ni dawn

Chanmari West, 10<sup>th</sup> November, 2013 : Ni 8.11.2013 (Zirtawp) zana Branch Executive Meeting chuan Sport Organizing Committee-in a lo rel tawh Chanmari West Branch YMA member-te tana Intihhlimna hun chu Ni 14.11.2013 (Ninga) zan aṭang hian Indoor Stadium-ah neih nise a ti. He intihhlimna hun hi Pu C Lalzarliana, President CWBYMA chuan zan dar 6:30-ah a hawng ang.

Branch Executive Meeting hmasa lamin a lo rel tawh angin he Intihhlimna hun hman dan tur hi Organising Committee chuan uluk takin a lo ngaihtuah hmasa a, rawtna an rawn siam chu Branch Executive Meeting chuan ennawnin hetiang hian ruahmanna siam a ni. Intihhlimna tur item-te

- 1 Volleyball (Mipa & Hmeichhia)
- 2 Badminton (Mipa) Double 2 pairs
- 3 Table Tennis (Mipa) Double 1 pair

Heng bakah hian Volleyball-ah hian Branch OB, Section OB leh Branch Executive Member-te tan intihsikna buatsaih a ni bawk ang.

Item hrang hranga Lawmman tur pawh hetiang hian siam a ni:

- 1) Item tina Pakhatna - ₹ 500
- 2) Item tina Pahnihna - ₹ 200
- 3) Participation Prize - ₹ 100
- 4) Overall Champion hnenah Thuziak (Citation) pek a ni ang.

Item pathum atan hian Section tinin Entry Fee ₹ 500 chu Nov ni 13 ral hmain Pu C Zonunsanga, Organising Secretary hnenah pek tur a ni.

Tin, he intihhlimna atana kaihruaina hetiang hian siam a ni bawk.

### FAINA HNATLANG

Ni 14.11.2013 (Ninga) zing hian Hunthar veng nena inrinalah Chanmari West Branch YMA chuan member pum huap faina hnatlalang a kova, he hnatlalangah hian Chanmari West veng Area hre lo thalaite mahni veng chin hre tur leh humhalh turin Chanmari West Branch YMA chuan member-a inziak lut zawng zawng chu thawk chhuak ngei turin a hriattir. Chhawnzinga tuikhua thlangah zing dar 7:00-ah kim tur a ni a, chem, tuthlawh leh Bawngtuthlawh te thawhchhuahpui tur a ni.

### Branch News

- Branch Fin.Secy Pu Lalrinliana chu a nupui Pi K Sanghluni mit entir hruaia Guwahati-ah hun eng emawchen a awm hnuin dam takin a lo haw leh ta.
- Branch Executive Member Pu C Lalmuankimate chhungkua chu chung lama in tharah an in suan fel ta.
- Pi Lalrampari w/o Pu Lalliansangpuia Branch Executive Member Steno Grade - I a kaisang chu an lawmpui hle.
- Branch Executive Member Pu Lalchhanima Silchar-a zin pawh dam takin a lo haw leh ta.
- Branch Executive Member Dr Lalramliana chu Masihi Sangati khawmpui hmangin Saiha ah a zin mek.

### ADVANCE KRISMAS & KUM 2014 HRUATU THLAN

Ni 17.12.2013 (Thawhleh) zan hian Advance Krismas leh kum 2014 hruaitu tur thlanna YMA Zawlbukah neih tum a ni.

### PUAK THEI THIL LEH SILAI LEM

Chanmari West Branch YMA chuan mihring hriselna tichhe thei, puak thei thil-halpuah leh halmawi, silai lem (a mu nei) sorkar phal loh vengchhung mipuite zuar lo leh hal lo/hmang lo turin a ngen.

### AWM THAR

Pu Samuel Remlalkhaia te chhung member 4, Tuikual South aṭangin Pu Hrangbuka in Ch-Sect-ah Pu Zathanga te chhung an fin.



### TUNKAR CHANGAWN

Lang lo tura thuhruk engmah a awm si lo; hriat loh tura zep pawh engmah a awm hek lo. Chuvangin thima in sawi apiang kha engah an la hria ang a; pindan chhungirla beng bula in thusawi kha in chunga chuangin an la tlangaupui ang. Luka 12:2,3

**Editorial Board**

<b>Editor:</b>	R Lalrinngheta	9862358337
<b>Joint Editor :</b>	Lalchhandama	9862358347
	J Lalnangliana	9862399658
<b>News Editor :</b>	Thangkhuma	9862303135
	Lalchhuanmawia	9862580558
	K Lalremtluanga	9862119608
<b>Cir.Manager :</b>	Jacob Lalrinsanga	9612319779
<b>Production Manager :</b>		
	RL Thanhnuna	9436152760

**Branch Office Bearer**

<b>President</b>	C Lalzarliana	9436142049
<b>Vice President</b>	K Darthantluanga	9436196071
<b>Secretary</b>	Zairemmawia	9862385654
<b>Asst. Secretary</b>	RL Thanhnuna	9436152760
<b>Treasurer</b>	R. Lalhmachhuana	9436151817
<b>Fin.Secretary</b>	Lalrinliana	9862581814
<b>Adviser-te :</b>	Pu F Zosanga	9436142106
	Pu A Biaklawma	9436363169
	Pu Lalrengpuia Sailo	9862075614

**Editorial :**

Tunlai chu MLA Election nge kan tuipui ang aw MPL hi? tih inzawt ta ila, chhanna a inang lo thei viau ang. Thenkhat chuan kan vengin MPL kan khel tih pawh an hriat mang loh laiin, a then chuan kan bialah tute nge inkhing dawn tih kan ngaiantuah ve miah lo thung. Hei tak hi, Khawvel nawmna chu a ni ve lawi si.

Inthlan lam chu a buaipuitu bikte tihturah lo dah phawt ila, MPL khelh hian kan vengah eng nge nghawng a neih tawh a, engchen nge kan thlen dawn i lo chhui chhin teh ang.

Tunah hian kan veng chhung thalai tam tak chuan CWFC inkhelh zan leh inkhelh hunlai chuan khaw dang an hawi thei ta meuh lo mai. Tin, pawl hrang hrangin inkhelh hunlaiin ruahmannna leh tihtur dang engmah an chhawp chhuak ngam ta meuh lo bawk.

Hetiang hunah hian YMA member-te leh Kristian thalaite hian rilru fim tak kan put a ngai khawp mai. Kan rawngbawlina (YMA leh Kohhran) tibuai khawpa thil danga kan lo buai ve viau hian hmasawnna tak tak min thlen lo tih hriat a tha. Tin, inkhelhna lamah hian nun a zalen a, nunphung hloh thaka khawsak maite pawh a awl. Chuvangin kan nun fimkhur a ngai khawp mai. Kan awmna tur hmun dik taka kan awm loh apiang hian kan rahbi a fuh tawk lo fo.

**Article****Election News ni loin thildang news zawk le...*****Lalmuanpuia Zawngte***

Tunlaia Mizoram mipui titi tam ber leh ngaiantuahna luauhtu ber chu eng party-in nge sawrkarna siam ang tih hi a ni awm e. Keini vengah phei chuan kan veng mite hi an 10:18 PM 11/8/2013 tiling zo ang em? tih hi kan inrinsiak luih luih a ni ber. Hetihlai hian Mizoram sawrkar chuan a hnathawktu mi 5 (5 officers) te chu IAS (Indian Administrator Service) post pakhat (1) luah turin Union Public Service Commission (UPSC) hnuua interview hmachhawn turin a chhawpchhuak ve mek bawk. Heng Officers tha chungchuang panga (5) te zingah hian kan vengpa ngei mai Pu HVL Zarzoenga chu a tel ve tlat mai le. Kan chhuang takzet e! Eng vanga UPSC hnuua interview tur nge tih leh tuldang ka hriat ve chhun chhunte bengvarna a lo nih beisein kan han sawi zau ve ang e.

Mizoram sawrkar hnuuaiah hian IAS post hi 29 a awm a. Chung zingah chuan sawrkar-in tul a tihdan a zirin MCS-in Post 15 an chang a, direct IAS-in post 12 leh Non-State Civil Service (Non-SCS)-in post 2 an luah thei a ni. A tak takah erawh chuan heng IAS post 29-te hi hnawh khah a ni ngai meuh lo. IAS tamtak (hnamdang) te hian Mizoram hi chhuahsan an duh deuh tlangpui thin. Tichuan Pu Zoenga te interview-na tur hi Non-SCS atanga post khat (1) luauhtu tur a nih chu. Hetiang mi kan vengin kan nei hi a chhuanwm tak zet a, Non-SCS atanga interview tura thlan chhuah nih theih hrim hrim hi thil namai a ni hauh lo. Mizoram sawrkar hnuuaiah Officers heti zozai an awm a, chung zinga a tha zual panga (5) zinga tel nalh chu ropui tak a ni ringawt. Tin, Non-SCS atanga IAS nalh tur chuan a saptawngin 'Right Person at the right time and at the right place' nih ve chu a ngai. ACR/APAP (kan hriathiam em ang chu) tha chungchuang tak, kum 5 or 7 senior Grade Officer an nih hman a ngai a, kum 5 or 7 (a kum zat hi ka chiang lo) service an la neih a ngai bawk. Heng ho atang hian screening committee-in mi 5 UPSC hnuua interview turin a recommend thin a ni.

Kum 2000 khan Pu K Lalnghinglova, tuna Secretary to the Govt. of Mizoram hi Non-SCS atang hian IAS ah a lo lut tawh a ni. Amah hi chutianga uluk taka sawrkarin a lo thlan chhuah a nih ang ngeiin IAS direct a lut ho zingah pawh a hniabik lova, kawng engkimah a fit em em a ni. Chutianga sawrkarin mi tha, dik leh rinawm, hna thiam bawk si a thlanchhuante zingah kan veng pa ngei mai zu han tel ve tlat a.....!!

A nih leh Pu Zoenga chu lo tiling ta se engtin zel nge ni ang? E le, a lo tiling ta a nih chuan Lal Bahadur Shastri National Academy of Administration (LBSNAA), Mussoorie, Uttarakhand-ah training turin kum thar lamah min liamsan daih mai ang maw le! Heng

Service atanga IAS lut ho (confer-an tih) te pawh hian a bulle atanga training engkim an tih leh vek a ngai a, direct atanga lut hote nen an training ho leh vek thin a ni.

Amaherawhchu, service dang atanga lut ho reng reng chu an lo service tawh kum engemaw zat (ka chiang ta mai lo) chu chhiarsak an ni a, chuvangin training rual theuh theuh training an zawh meuh chuan an in senior hleih a, an dinhmun leh posting-ah pawh an inthlau thei viau nghal thin. Engpawh nise, fate rual lek lekte nen an training ho dial dial phawt chu a ngai dawn a ni.

Tichuan, amah Pu Zoenga chu a lo tiling ta a nih chuan training a zawh hnuah AGMU Cadre pek a ni ngei ang a, Mizoram chhungah a awm nghal lo mai thei. Kum rei vak lo chu Delhi or India ram khawpui lian a Mizoram aiawhin Residential Commissioner (RC) ah te a awm kual thei bawk. Chuta tanga Mizoram a lo chuang chhuak leh a nih vah chuan UD&PA chauh ni loin Secretary to the Govt. of Mizoram a ni tawh hrim dawn a ni. Chutah zet zawng, Awi ka rei... Pu Hlutea te nen chuan a bulah kan inkhelin kan au te chel chul ngam meuh tawh lo ang. A badminton khelh pawh a thiam sawtin a vuak (smash) reng reng pawh kan lo la (return) thei tawh lo ang a, a hma zawnga pangpar huan lama khel thin kha kan bulah automatic-in a rawn khel pha nghal ang a, partner atan kan inchuh deuh laih laih tawh ang a, tlai takah lo kal pawh nise kan lo kian zung zung tawh ang.

In chawimawi a, lo inlawmpui a, chibai a lo intlawn siak nghal ringawt tumte kan awm palh ang e, a la tih chi miah lo. Amaherawhchu heng thil a lo thlen chhoh dan hriat a inngaihsan erawh a hun ve tho nia ka hriat avangin he thil hi veng mipui te hriat atan ka han ziak ve mai a ni e. Hetiang mi fel tak naute han neih hi chuan U zawk nih hi a lo hrehawm bik hauh lo mai....hahaaa....!

**Chawngbawla Section**

- Ni 5.11.2013 (Thawhleh) zan khan meeting an nei.
- Ni 7.11.2013 (Ninga) zan khan Kuang duan hnatiang an nei a, hna tlanga thawkte ei leh in siamna atan Pu C Laltanpuia te chhungkuain ₹ 500/- a pe a, an lawm hle. Tin, Pi Rintluangi (RTS) te chhungin thingpui leh a hmeh tui hnai tak a siamsak bawk a, an lawm hle.
- Ni 9.11.2013 (Inrinni) khan New Horizon School-in Kum 10 an tlin an lawmnaah Security Duty-ah an tang, an sikul kal zelna turah duhsakna an hlan.

**Khuangchera Section**

- Ni 12.11.2013 (Thawhleh) zan hian meeting neih an tum.
- An hruaitu Dr David Malsawmkima, Department training-a Jaipur (Rajasthan) a awm mek pawh dam taka a lo haw leh thuai an beisei.
- Branch hmalaknaa Section wise-a Indoor Games - Volleyball, Table Tennis leh Badminton hmanga neih tur a ni a. He lama tui mite lo inbuatsaih turin an inhriattir.
- Chhiatni Fund khawn nawn lehna khawn zawh tawh a ni a. A khawntute'n a ranglama Asstt. Leader Pu HV Lalthavela hnenah thehlut turin an inhriattir.
- Chawngbawla Section YMA-te'n C. Weststock 2013 Beat Contest an buatsaih turah he lama tui mite chu a tam thei ang ber Section atanga tel turin an sawm.

**Neuva Section**

- Ni 12.11.2013 (Thawhleh) zan hian meeting neih an tum.
- Section intihhlimna neih tur atan infiam mi te in la fit turin an in ngen a, he infiamnaah hian section dangte nena inhmelriatna leh in kungkaihna tha zawk a awm theihna atana duan a nih angin mawi tak leh thianghlim taka inkhel theuh turin an inchah bawk.
- Section Inelna Item zing a mi Table Tennis khel tur te chu Pu EVL Hruaitluanga, Secretary hnenah in hriattir tur a ni.
- Section huam chhungah zurui, midangte tana bengchheng siam an awm thin chu pawi an ti a, Bengchheng siam thin te sim vat turin an in chah a, hetiang a bengchheng siam an awm leh a nih chuan Section Committee chuan dim a tum lo hle.

**Taitesena Section**

- Ni 12.11.2013 (Thawhleh) zan hian meeting neih an tum.
- An hruaitu Pu V.Z Muana chu a unaupa, Kawllem amiin a boralsan a, an tawrhpu hle.
- Branch hmalaknaa Section Wise (Indoor Item) neih turah section member te lo inbuatsaih turin an inhriattir.
- An section Leader Pu Lalmuankima Chawhte chuan in thar tha tak a luah ta a, an lawmpui hle. Tin, a lawmna atan hruaitute chawhlui a buatsaihsak dawn a, an phur hle.
- Chhiatni Fund (khawn nawnna)-chu an khawn fel tawh a, ₹ 26600 an khawn chhuak thei.
- Da 3 Amigo's ten section-in an hman atan Thingpui Fe Thlitna tha tak mai an pek avangin lawmthu an sawi.
- Section Jerssey la kawlte'n a ranglamin Property In charge Pu R Lalsangzuala hnenah theh luh tur a ni e.

**Vanapa Section**

- Ni 9.11.2013 (Inrinni) zingkar khan Vanapa Run-ah an meeting.
- Ni 14.11.2013 hian Lengpui-ah Section picnic neih tum a ni a. Picnic naa kal tumte chuan Ni 11.11.2013 zan dar 7:00 thleng hming pek luh theih a ni ang. A hun chhunga hming pe lote chu kal lo tura ngaih an ni ang. Pu CL Thiaghlima kawt atanga chhuah tur a ni a, lirthei nei chuan thawhchhuahpui theuh nise. Picnic na a tel tur hian Branch Executive leh Section hrang hrang OB-te an sawm.
- Annie Zothansangi chu dam lohna avangin Phai lamah inentirin a kal mek a, dam taka a lo haw leh ngei an duhsak.
- Pu HVL Zarzokima te'n fapa duhawm tak an nei a, an lawmpui hle.
- Ni 14.11.2013 atanga Section-te Intihhlimna neih turah hetiang hian In charge an insiam:
- 1 ) Volleyball (Mipa)  
Tv Lalduhawma Hnamte
- 2 ) Volleyball (Hmeichhia)  
NI Melody Lalhriatkimi
- 3 ) Badminton  
Pu RK Ramherliana
- 4 ) Table Tennis  
Pu John Lalduhawma

**Kan Then Tak****K MANTHANGA**

Ni 20.4.1940 khan Khuangleng khuaah, Pu Hrangmura leh Pi Damhleii nupa karah a lo piang a. An unau hi mipa 4 leh hmeichhia 5 an ni. Pu Manthanga hi pa kawm nuam leh zaidam, mi hlim thei tak mai a ni a, c h u n g k a w tihlimtu leh huikhawmtu bera ni. Zaina mi leh lungleng thei tak a ni. Pi Kapkimi nen inneiin fapa 2 leh fanu 1 an nei. Wesleyan Methodist Kohhran-ah awmin Kohhran Upa-te pawh a lo ni tawh a, mahse, a hriselna a that vak loh avangin a chhunzawm thei ta lo a ni. Kum 2009 atangin natnain a tlakbuak tan a, Damdawi In hrang hrangahte a lut tawh a, mahse that chhuah tak tak a nei thei ta meuh lo a ni. Ni 21.10.2013 khan Aizawl Hospital-ah a lut a, a natna hi zual zelin Ni 1.11.2013 (Zirtawp) zan dar 6:40 khan chatuan ram a lo pan ta a ni.

**CWFC JERSEY**

CWFC (MPL) jersey chu veng mipuite inpekna zarah thahnem tak hrall chhuah a lo ni ve ta reng mai a, jersey-te hlutsaka leitute chungah CWFC chuan lawmthu a sawi tak meuh va. Chutih rual chuan an Jersey-te zahsak a, ruihhlo ti chung leh rui chunga ha lo tur leh tihnamnah lo hram turin Jersey leitute an ngen tak meuh a ni.

**INTHLAN CHUNGCHANGA MPF****THUCHHUAH**

MPF Chanmari West chuan MLA inthlanpui lo awm tur atana mipuite leh party hrang hrangte candidate leh party worker-te lo hriat atan leh zawm ngei turin hetiang hian thuchhuan an siam:

- 1) Candidate te'n House-to-House campaign chu inthlan hma ni 10 thleng an nei thei ang.
- 2) Mipui, pawl leh kohhranin Candidate te hnenah thil phut neih loh nise.
- 3) Ni 15.11.2013 (Zirtawp) zan dar 7:15 hian YMA Park-ah Joint Platform buatsaih a ni ang.
- 4) Chanmari West-a Boot hrang hrangte:  
Boot No 1 - Primary School  
Boot No 2 - High School  
Boot No 3 - Middle School (a hnuai)  
Boot No 4 - Middle School (a chung)  
Boot No 5 - YMA Zawlbuk

**CWSC FOOTBALL**

- MPL Player-te leh Coaching Staff-te chawhlui buatsaihsaktute-Pu H Lalnuntluanga (V-sect) leh Pu T Bualzika (President, CWSC)-te chungah lawmthu an sawi.
- Club tana pawisa petute Pu T Bualzika (₹ 10,000) leh CVTTP (₹ 1,000) te chungah an lawm hle.

□ Nov ni 2 zan khan Dinthar FC nen inkhelin 1-1 in an inhnehtawk a, ni 9 (Inrinni) zan khan Luangmual FC nen an khel leh a, chanchinbu buatsaihlai hian result hriat a la ni lo. Nov ni 14 (Ninga) tlai dar 3:45 hian Reitlang FC nen an khel leh ang.

□ Veng mipuite tha leh zung senga Club inkhel tawiawm thintute chungah lawmthu an sawi takzet.

□ MPL khelh mek atana veng chhunga Donation khawnna tura lehkha an pek tawhte chu tunkar chho hian an rawn khawn dawn a, chhungtinte thahnemngai taka lo pe turin an ngen.

□ PPP Mode bawlhhlawh paikh man khawn mekah chhungtinte thahnemngai leh zual turin an ngen.

□ MPL khelh leh turah veng mipuite tawiawmna an ngen leh a. Tin, inkhel entute mawi taka kan player-te au phur thin turin an sawm bawk. Veng timualphotu ni lova, player-te tawiawmtu tha tak ni theuh turin inkhel entute an sawm bawk.

**CWSC VOLLEYBALL**

□ Inter Village Volleyball tournament Tuikual Indoor Stadium-a khelh mekah Mipa Team leh Hmeichhe Team chhuah a ni a. Hmeichhe Team-te hian Tanhril Local Council Team 3 - 0 a hnehin nimin khan Armed veng nen an khel leh a, result kan hre hman ta lo. Mipa Team-te'n Vaivakawn 3 - 0 a hnehin ni 12.11.2013 (Thawlehni) hian an khel leh ang.

□ Tournament chhuah theih nan heng mite hian tanpuina an pe a, an chungah an lawm hle.

1. L.S. Bakery - Team Jersey

2. Pu R. Rokima - ₹ 1500

3. Pi Zamanthangi - ₹ 1000

□ An hruaitu NI Saidingiani chuan Mission Veng-ah pasal a neihsan a, an ui viau rualin hlim taka khawsael turin duhsakna an hlan.

□ An Secretary Tv R Lalfakzuala chuan section hruaitu inkhelhnaah a ke ruh a titliak palh a, a dam that leh thuai pawh an duhsak hle.

**NGENNA**

Ni 7.11.2013--a Thingsulthliah-a Taxi hmang kha i contact number kan hre si lova, i veng hming chiah kan hre si a, khawngaiha a hnuai number-ah hian min rawn biak theih chuan kan lawm ngawt ang.

9856514989

**S. INDIAN CHICKEN TANDOORI**

Thian ho leh chhungkuaa ei atan order theih a ni leh ta e.....

Contact - 9615332544

Vohbik Sa Dawr

Chanmari West - CH Sect

**ARVY 3D CINEMA**

Zodin Square, near Bus Stand RZ Annexe building 5th floor. Film thar hmuhnawm tak tak (2012 - 2013) en tur a awm e.

Showtime 11:30am, 3pm, 7pm

Ticket : Rs 150, Rs 100

Ph. 2325798, 9774310525  
(2-2)

**MS MEMORIAL OPEN SCHOOL****Admission Notice**

Kum 2013-2014 Session atan October 2014-a exam turin admission hawn a ni ta e. Zirtirtu rintlak leh thiam tak takte enkawlna hnuaih class regular-a kal thei leh thei lote pawh kan buaipui thei e.

Admission fee : Cl X ₹ 1200

Cl XII ₹ 1500

Class timing : 6:00 - 8:00am

A hmun : Newfoundland School, Chaltlang, Lilly Veng, Sairang road.

Admission form lakna :

Sangtei dawr, Chaltlang dawkawn

Varte Variety Store, Sairang road

Muantei Tailoring, Ramhlun Industry peng bazar chung Upa Unionthanga dawr, Chaltlang, Lily veng.

Hrechiang duh tan a hnuaih phone No. ah hian zawhfiah theih a ni e.

Cont : 9612613315/879424115/  
9862210125/9774627484(2-2)

**PROPERTY SUB-COMT**

□ Ni 14.11.2013 (Ninga) hian hnatiang koh tum a ni a, tuboh leh Chheni-te thawh chhuahpui nise, member-te kim taka thawk chhuak turin an inhriattir.

□ YMA Park-a thutthlengte hi Steel-a thlak turin hmalakna kalpui mek a ni.

□ YMA Park-ah ruihhlo tih leh ruih buai khap tlat a ni.

**CVTTP**

□ Ni 5.11.2013 (Thawleh) zan khan Executive meeting an nei.

□ Lehkhabu thar, Mizoram State Library atanga dawn 155, pawl sum atanga lei 46, mimal thahnemngaita pek 5 leh Branch YMA pek 5 (a vaiin 201) te chu Ni 7.11.2013 khan an register fel a, Ni 9.11.2013 atang khan member-te hawh chhuah theih turin an tlangzarh.

□ Kumin chhunga Library atanga Lehkhabu hawh tamte hnenah Lawmman 1-na atanga 3-na thleng pek an tum.

□ CWFC in MPL an khelh mekah tanpui nan ₹ 1000 an pe.

**HLIMI TUI**

Tui thiaghlim tak 207-in 2000 lts. kan pe thei reng e, a pumpna khawl leh pipe sei kan nei bawk e.

Ph. 9120357528, 9612164673  
(4-2)

**VAWKPA CHI THA**

Vawkpa, chi tha tak mai, chi thlahtu kan nei e. Mamawh apiang tan koh theih kan ni e.

Vanlahruaia - 03892343413

H.No-T-82

Chanmari West

**KEIMAHNI**

□ News Editor Pu CHMA, chhungkaw lam harsatna avangin a rawn tel thei lo va, kan ngai hle mai.

□ YMA AW min tawiaawmtute - Tv Israela, Tv Zaitea, Pu Zotea leh Tv Zualtea te chungah lawmthu kan sawi e.

□ Joint Editor Pu Nanga'n Arsa tui tak maiin a kang a, kan ei puar khawp mai.

□ MPL leh MLA inthlan kan chawhpawl nuai a, titi a tui tlang viau mai.